

**FEDERALNO MINISTARSTVO RADA I SOCIJALNE POLITIKE  
EKONOMSKO- SOCIJALNO VIJEĆE ZA TERITORIJU FEDERACIJE  
BOSNE I HERCEGOVINE**

Broj: 03-34/19-104/10  
Sarajevo, 26.01.2010. godine

**Z A P I S N I K**

sa 66. sjednice Ekonomsko-socijalnog vijeća za teritoriju Federacije Bosne i Hercegovine, održane dana 26.01.2010.godine u 16,00 sati.

Sjednicom predsjedava gospodin Edhem Biber, potpredsjednik Ekonomsko-socijalnog vijeća.

Sjednici prisustvovali:

Dr. Perica Jelečević, federalni ministar rada i socijalne politike, Vjekoslav Bevanda, federalni ministar financija, Nail Šećkanović, federalni ministar prometa i komunikacija, Desnica Radivojević, federalni ministar trgovine, Radovan Vignjević, koordinator, Rifat Mahmutović, predsjednik Sindikata komunalne privrede, Salih Kruščica, predsjednik Sindikata radnika u javnoj upravi, Omer Sikira, predsjednik Samostalnog sindikata elektroenergetskih radnika BiH, Salem Hujjić, predsjednik Samostalnog sindikata radnika šumarstva, prerade drveta i papira BiH, Predrag Čović, Mladen Pandurević i Eldin Brčaninović ispred Udruženja poslodavaca Federacije BiH.

Sjednici nisu prisustvovali:

Vahid Hećo, federalni ministar energije, rudarstva i industrije, Mehmed Čorhodžić i Miralem Jahić, ispred Udruženja poslodavaca Federacije BiH. Umjesto ministra bio je prisutan njegov zamjenik Stipo Buljan .

Osim članova Ekonomsko-socijalnog vijeća sjednici su prisustvovali:

Ivan Matešić, pomoćnik federalnog ministra pravde, Džana Kadribegović, pomoćnica federalnog ministra rada i socijalne politike i Ernevaza Hrustanović ispred stručne službe ESV-a.

**DNEVNI RED**

1. Usvajanje zapisnika se prethodne sjednice Ekonomsko-socijalnog vijeća;
2. Prednacrt Zakona o plaćama i naknadama u organima vlasti FBiH;
3. Prednacrt zakona o izmjeni Zakona o posredovanju u zapošljavanju i socijalnoj sigurnosti nezaposlenih osoba;
4. Informacija o realizaciji mjera iz Operativnog plana za implementaciju Socijalnog sporazuma 2009.-2010.godine. i Programa mjera za ublažavanje posljedica globalne ekonomske krize i unapređenje poslovnog ambijenta;
5. Program rada Vlade FBiH za 2010. godinu.

Dnevni red je jednoglasno usvojen.

#### **Ad.1.**

Zapisnik sa 65. sjednice Ekonomsko-socijalnog vijeća usvojen je bez primjedbi.

#### **Ad.2.**

Vezano za Prednacrt zakona o plaćama i naknadama u organima vlasti FBiH delegacija Sindikata uputila je kritiku da je opet napravljena proceduralna greška, obzirom da je zakon otišao u parlamentarnu proceduru u formi nacrt, bez mišljenja Poslodavaca i Sindikata.

Uvodne napomene dao je Ivan Matešić, pomoćnik federalnog ministra pravde, koji je rekao da je resorno ministarstvo neformalno vodilo razgovore sa predstavnicima Sindikata o njihovim primjedbama na Nacrt navedenog zakona.

Ocjena delegacije Sindikata jeste da u osnovi ovaj zakon nudi dobra zakonska rješenja, počevši od transparentnosti kada su u pitanju visine plaća, od predsjednika FBiH pa sve do pomoćnog radnika. Osnovno što Sindikat podržava i što je usvojeno na Upravnom odboru SSS BiH je da na svim nivoima vlasti platni razredi i koeficijeti budu isti, za iste i slične poslove.

Ali, ima i niz nelogičnosti i određenih stvari koje su svjesno izbjegnute, kao što je nepoštivanje obaveza iz Opšteg kolektivnog ugovora i prava koja su zagarantovana državnim službenicima i namještenicima.

**Ekonomsko-socijalno vijeće je podržalo Prednacrt zakona o plaćama i naknadama u organima vlasti FBiH.**

**Preporuka Ekonomsko-socijalnog vijeća je da Vlada FBiH razmotri primjedbe Sindikata i Poslodavaca, nakon čega bi se organizovao trilateralni sastanak socijalnih partnera, radi pronalaženja zajedničkih rješenja prije izrade Prijedloga zakona.**

#### **Ad.3.**

Dr. Perica Jelečević, federalni ministar rada i socijalne politike rekao je da je usvajanje Zakona o izmjeni Zakona o posredovanju u zapošljavanju i socijalnoj sigurnosti nezaposlenih osoba, zahtjev Svjetske banke u sklopu reforme socijalnog sektora. Visina novčane naknade koja se uplaćuje nezaposlenim osobama dostigla je visinu najniže plaće, tako da će ove izmjene zakona doprinijeti stimuliranju nezaposlenih da aktivno traže posao. Prema podacima Zavoda za zapošljavanje FBiH u novembru je naknade primalo oko 9.000 nezaposlenih.

Vrijeme korištenja naknade svedeno je od mjesec dana do 12 mjeseci. Jedna mjesečna naknada bit će isplaćivana osobama sa najmanje osam mjeseci staže, dok će naknadu 12 mjeseci moći ostvarivati osobe koje su u momentu otkaza imali najmanje 30 godina staža. Također, visina naknada zavisit će od prosječne plaće koju je nezaposlena osoba primala i od uplaćenih doprinosa za osiguranje za slučaj nezaposlenosti.

Za delegaciju Sindikata ovo je jedan od ključnih zakona za nezaposlene i apsolutno su neprihvatljive predložene izmjene i dopune. Smanjenje naknada za nezaposlenost i skraćivanje vremenskog perioda njegove isplate predstavlja veliku udar za osobe koje u

vrijeme ekonomske krize ostaju bez posla. Veliki broj ljudi ovakvim zakonom izgubit će materijalnu potporu, što će doprinijeti porastu siromaštva i jačanju neformalnog sektora.

Poslodavci su jedinstveni u činjenici da se ne može voditi isključivo socijalna politika i izdvajati novčana sredstva za socijalne potrebe. Niko se ozbiljno ne bavi o zapošljavanju radnika, poticajima koji bi zadržali postojeća radna mjesta i otvorila nova, o poticajima u privredi.

Svi segmenti privrede su ugroženi, problemi u privredi su daleko veći nego što izgleda i što pokazuje statistika i treba što ih što hitnije rješavati, pogotovo ako se ima u vidu da se u ovoj godini očekuje pravi udar ekonomske krize koji će dovesti do novih otpuštanja radnika, ocjena je Poslodavaca.

**Nakon diskusije Ekonomsko-socijalno vijeće donijelo je zaključak da će delegacija Sindikata u cilju poboljšanja teksta i iznalaženja novih i prihvatljivijih rješenja Zakona o izmjeni Zakona o posredovanju u zapošljavanju i socijalnoj sigurnosti nezaposlenih osoba, svoje primjedbe i prijedloge dostaviti Vladi FBiH kako bi se razmotrilo njihovo prihvaćanje.**

#### **Ad.4. Ad.5.**

**Na osnovu dogovora sa premijerom Vlade FBiH Mustafom Mujezinovićem, na jednoj od narednih sjednica Vlade FBiH bit će razmatran izvještaj o realizaciji Operativnog plana za implementaciju Socijalnog sporazuma 2009.-2010.godine i Programa mjera za ublažavanje posljedica globalne ekonomske krize i unapređenje poslovnog ambijenta, kao i Program rada Vlade FBiH za 2010. godinu. Na sjednici Vlade FBiH prisustvovati će delegacije Sindikata i Poslodavaca.**

**Pozivajući se na zaključak sa 57. sjednice Ekonomsko-socijalnog vijeća kada je donesen zaključak da se radi efikasnijeg rada ESV-a formira uži Kolegij ESV-a koji je do sada održao šest sastanaka, socijalni partneri traže da se nastavi sa prekinutom praksom i da se ubuduće, prije sjednice Vlade FBiH, održi kratki Kolegij ESV-a.**

Sjednica Ekonomsko-socijalnog vijeća zaključena je u 17.30 sati.

Naredna sjednica Ekonomsko-socijalnog vijeća zakazana je za 23.02.2010. godine, sa početkom u 16,00 sati. Predloženi dnevni red je:

1. Usvajanje zapisnika se prethodne sjednice Ekonomsko-socijalnog vijeća;
2. Izmjene i dopune Općeg kolektivnog ugovora za teritoriju FBiH;
3. Prijedlog Zakona o izmjenama i dopunama Zakona o Poreznoj upravi FBiH;
4. Zakon o fiskalnim sistemima;
5. Nacrt Zakona o javno-privatnom partnerstvu.

Zapisnik vodila i sredila  
Elmedina Šehović

Predsjedavajući  
Ekonomsko-socijalnog vijeća  
Edhem Biber